

Date – 17/05/2025

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. Territorial Army Batallion Hqtrs hmun tur remchang thlithlaiin Chief Minister Pu Lalduhoman vawiin khan Lungleng khua a tlawh.
2. Central YMA, Central Anti Drug Squad chuan kar khat chhungin ruihhlo thahnem tak an man a, hemi kaihhnawihah hian mi 36 man an ni bawk.
3. India-in Pakistan thlawp firfiakte laka a dinna chiang taka hriattir turin khawvel ram hrang hrangah party tin telna palai pawl a tir chhuak dawn.
4. Khawvel pumah chaw khamkhawp hmuh loh avanga riltam an pung zel niin United Nations Food and Agriculture Organisation (FAO) chuan a sawi.

<><><>

MIZO TERRITORIAL ARMY

Chief Minister Pu Lalduhoman vawiin khan Lungleng khua a tlawh a. An khaw ramah Territorial Army Batallion Hqtrs hmun tur remchang a awm dawn em tih thlithlaiin, Bethel Ministry in Human Development Centre din an tumna hmun a enpui nghal bawk.

Chief Minister hian Lungleng khawtlang hruaitute kawm bawkin Lungleng lal Khamliana in kawtah hun hman a ni a. An khawtlang mamawh hrang hrang te Chief Minister hnenah hian an lo thlen.

Nimin khan Mizo Territorial Army dinna tur thil pawimawh ngaihtuahin Coordination & Land Search Committee an thukhawm a, Mizo Territorial Army dinna atan thil pawimawh ngaihtuah turin Mizoram Sorkar chuan Thawhlejni khan Coordination & Land Search Committee hi a din a, Territorial Army Company 2-te lo awm lailawkna tur Aizawl leh Lungleiah zawn ni se, an ti a. Territorial Army-ah hian Mizo thalaite an luh theih nan ruahmanna hrang hrang lo kalpui turin Mizoram Youth Commission leh Sainik Welfare & Resettlement chu ruahmanna lo kalpui tura ruat an ni.

Coordination & Land Search Committee Chairman Pu Clement Lalhmingthanga chuan tunhnai khan Mizo hlang awmna Territorial Army (TA) Company pahnih (2) din a ni dawn tih alo sawi tawh a, hemi atan hian kumin June ni

24 atangin Recruitment Rally chu District wise a neih tan a nih tur thu sawiin Central Sorkar in quota a siam sak chu Mizo thalaiten a vaia hnawhkhat thei turin Recruitment Rally-ah hian Mizo thalai tam thei ang ber inlan turin a sawm a. He hamthatna hi um a, thahnem ngai taka a hlawkna tel ngei turin a sawm bawk a ni.

(PR)

<><><>

MJA GENERAL DISCUSSION

Mizoram Journalist Association, General Headquarters Aizawl-in nimin khan Raltlan, ramri hung leh ruihhlo chungchang an sawi ho.

MJA General Headquarters Aizawl buatsaih raltlan, ramri hung leh ruihhlo chungchang sawihona ah hian Thupui hawngtu senior journalist Pu HC Vanlalruata chuan, India leh Myanmar ramria zalen taka inkalpawh theihna Free Movement Regime (FMR) chu kum 1951 atanga hman tan a nih thu a sawi a, FMR chu tha taka a kal laiin Manipur sorkar nawrna avangin Sorkar laipuiin February 2024 khan a titawp a, tihtawp a nih chhanah helpawl leh dan lova ruihhlo leh thil chi hrang hrang tawlh thin tihtawp duh vang nia sawi ani tih sawiin FMR hlih a nih rual hian ramri hung pawh sawi rik nghal chu Manipur Sorkar ngenna vang ani tih a sawi.

Pu HC Vanlalruata chuan, sorkar chhinchhiah danin, nimin thleng khan Mizoramah Myanmar raltlan 33,000 vel an awm a, Champhai district-ah mi 13,586, Siaha district-ah mi 6,017, Lawngtlai district-ah mi 4,876 leh Aizawl district-ah mi 3,716 an awm a ti a, Raltlante tan hian Relief Camp 125 siam a ni a, chhungte bel leh mi in luaha awm mi eng emaw zat an awm tih a sawi bawk.

MJA General Body Meeting-ah hian MJA member ten ramri hung, raltlan leh ruihhlo chungchanga an ngaih dante huam zau takin an sawi a. Ramri hung a thatna leh that lohna tur te, raltlante chungchanga sorkar leh pawl hmalakna atana tul nia an hriat te, raltlan chhinchhiahna, khuahkhirhna leh kaihhruaina tha leh mumal zawk siam a tul thu te, ruihhlo dona leh ruihhlo ngaite enkawlana sorkar, kohhran leh pawlte tan lakna turte leh ruihhlo ngaite enkawlana mumal zawk siam a tul thute an sawi lang a ni.

(Corr)

<><><>

CENTRAL YMA

Central YMA, Central Anti Drug Squad chuan kar khat chhungin ruihhlo thahnem tak an man a, hemi kaihhnawihah hian mi 36 man an ni bawk.

Central YMA hnuaia ruihhlo dotu pawl, Central Anti Drug Squad (CADS) chuan May ni 10-16 chhungin Heroin Hawng 7 leh Tictac bur 84; Zolplex mum 70 an man a. Hemi kaihhnawiah hian mihring 36 manin, mi 25 chu Counselling an pe a ni.

Nimin khan Excise and Narcotics Department te nen tunlaia ruihhlo leh a kaihhnawih dap chhuah chungchangah dan palzut lo a thawhdunna tha zawk an neih theih dan tur an sawi ho a, Excise & Narcotics Department Joint Commissioner Pu Peter Zohmingthanga chuan kalkhawmte chu mi man leh bungraw rinhlelh dapna kawnga dan zawm ngai hrang hrang te a hrilhfiah a, CADS Convener, Pu Roneihthanga Central YMA Treasurer ni bawk chuan, khawtlang himna atana

Excise leh YMA ten thawhdunna tha tak hnuaia ruihhlo do kawnga an hmalakna chu lawmawm a tih thu leh an hnathawh chuan rah tha zawk a chhuah ngei a beisei tih a sawi a,

Kalkhawm te hian ruihhlo in ram leh thalai te a tihchhiat nasat thu leh a ven nan theihtawp chhuaha thawhdun zel an tum thu an sawi a. Hemi kawngah hian ram mipui leh tlawmngai pawl dang te puihna an ngen bawk a ni.

(Corr)

<><><>

ACTION PLAN ON DRUG PREVENTION

Chief Minister Pu Lalduhoma’n ruihhlo ngai center-a awm te an dam chhuah theih nan leh mahni kuta an din theih nan kutkawih eizawnna tur thiam zirna ngaih pawimawh a tul thu a sawi.

Mizorama ruihhlo hluar zel dona chungchang leh ruihhlo ngaite enkawlna chungchang sawihona ah he thu hi sawiin Pu Lalduhoma chuan Jordan Center chu thiamthil an zir nghalna hmuna siam a that thu sawiin, hma la nghal turin thuneitute a chah a. TNT leh kohhranin a enkawl De-addiction Center pawhin skill development program hi an kalpui theih dawn chuan a tul anga sawrkarin tanpuina pek a inhuam thu a sawi bawk.

TBCC chungchang sawihonaah Social Welfare Minister Pi Lalrinpuii chuan sawrkar kaihhruaina hnuaiah an enkawl zawh tawk damlote admit a, mumal zawka kohhran leh khawtlang hruaitute nen thawkho chung a an kalpui tur thu a sawi a ni.

Social Welfare lam hian an hmalak mekna te leh an hmachhawp sawiin Mizorama Ruihhlo ngai enkawlna Integrated Rehabilitation Center for Addicts (IRCAS) 11 te tihlenna tur te, hetiang center la awm lohna District 5 (panga) Saitual, Khawzawl, Hnahthial, Lawngtlai leh Mamit a din ve na tura Ministry of Tribal Affairs a funding an zawn mek thu te, Thingsulthliaha Multi-Disciplinary Treatment & Training Center din tur chungchang leh Jordan Center kalpui dan tur te an sawi a ni.

Nimin vek khan Pi Lalrinpuii hian kohhran hrang hrang hotute leh tlawmngai pawl te kawmin center zawng zawng sawrkara an inziah luh vek a tul thu hrilhin, a inziak lut te chu sawrrkarin puih an tum dan te pawh a hrilh a. Ruihhlo ngaite enkawlna leh a invenna lama anmahni zawn theuh a tan la tura ngenin, thawhpuih a sawm a ni.

(DIPR)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PHE DEPT LABORATORY

Lawngtlaia PHE Department Laboratory chu tukin khan PHE Department-a Engineer-in-Chief Pu H. Dukima'n a hawng a, Mizoram khaw hrang hrangah Tui thianghlim mipuiin an neih theih nana enfiahna neih chu thil tangkaitak a ni a ti.

Pu Duhkima chuan Lawngtlai a Laboratry hawn tak chu khawvel pumpuia Tui thianghlim leh thianghlim lo tehna ah rin ngam, hman tlak a nih theih nan National Accreditation Board for Testing and Cabibration Laboratory in a endik turin ruahmanna siam a ni a ti a, Lawngtlai District chu Mizorama khua tamna khua 150 chuang awmna a ni a, khaw hrang hranga an tui tlante chu englai pawha enfiah reng ngai a ni a, hetiang Laboratory Lawngtlai a hman theih a ni ta chu thil lawmawm tak a ni a ti.

Engineer-in-Chief chuan Lawngtlai tui lakna chu ruahmanna siam lain mi pakhat in nitin Tui Litres 40 an dawn theihna tur a siam a ni a, khawpui thangzel ah mi pakhatin nitin Tui Litres 70 an dawn theih tura tihlen tum a ni a ti a, Department chuan mipuiin tui thianghlim hnianghnar taka an neih theih nan theihtawp a chhuah tih sawiin, tun dinhmunah englai pawha tui herh haw mai theih turin Aizawl a Seventh Day Tlang chu enchhin nan hman tumin hmalak mek a ni a ti bawk.

(Lalngheta Ralte PTC Lawngtlai)

><><>

DELEGATES FOR INDIA

India-in Pakistan thlawp firfiakte laka a dinna chiang taka hriattir turin khawvel ram hrang hrangah party tin telna palai pawl a tir chhuak dawn. Heng palaite hian India thawhpui ramte leh UN Security Council ramte an tlawh dawn a.Sawrkar lai leh opposition MP te bakah sawrkar mi pawimawh tak takte an tel dawn a ni.

Sawrkar aiawh palaite hi pawl pasarihah then niin an hruaitu atan BJP atangin Ravi Shankar Prasad leh Baijayant Panda, Congress atangin Shashi Tharoor, JDU atangin Sanjay Kumar Jha, DMK atangin Kanimozhi Karunanidhi, NCP atangin Supriya Sule leh Shiv Sena atangin Shrikant Eknath Shinde te ruat an ni..

(Newsonair)

<><><>

HUNGER

Khawvel pumah chaw khamkhawp hmuh loh avanga riltam an pung zel niin United Nations Food and Agriculture Organisation (FAO) chuan a sawi. Kum 2024 chhungin ram 53 atangin mi maktaduai 295 chuan chaw ei tur neih loh avanga riltamna nasa tak an tuar mek a. Hei hi kum 2023 aiin maktaduai 13.7 in an pung a. Kum ruk chhung chu a zawnin eitur nei lo riltam zat hi a pungchho tawh niin Global Report on Food Crises 2025 ah tarlan a ni.

Ram leh ram innghirnghona chu ei tur nei lo tamna chhan lian ber a ni a. Hei bakah hian ram thenkhata tam tla chuan nghawng na tak a nei a. Sudan, Gaza, South Sudan, Haiti leh Mali te chu eitur tlachham tamna ram an nih thu FAO chuan a sawi

([Newsonair](#))
<><><>